

## NAI 1 PETRUS YOM

### *BAUKLEL HANHANNU HAB ATAN AMENIG MEUM DAATE*

<sup>1</sup> Da Petrus, da am Jesus Kristusnu total danab. Da nai imu Kayaknu danab, Nug tituanatom ele, ag Pontus, Galata, Kapadosia, Asia, Bitinia, aben amu ohpa Juda danab do gopig daateb ele, ahilagnu yaatem. <sup>2</sup> Amu Kayak, ig Mamenig, Nug anuka ag doyata, nuhig Oudipa nuhikud danabnab daaglagnu amu ag Jesus Kristus ode dim lamidna, Nug tiigpa opia awak bena daaglagnu tituanatom. Kayaknu ehanitak okai hamu megte amu nuhig madod ele ahilagpa hanhan nadi daaglahnu ool daate.

<sup>3</sup> Kayak ihinig, Nug am Nadi Jesus Kristus Mameg amu, ig Nug binag metu! Adinu? Nug ihinignu oo gai iitanab doya, Jesus Kristus mauha, edua hibaitom amupa ig bauklel mekom. Nug ig amu mekom amunu ig Kayak noobpa bauklel ele daagnignu genab dootta, amu ameg metem. <sup>4</sup> Amu ele ig Kayak Nug bekod keeke madakunu dab mete ele, keeke amuam hanhan daaku, ii nauhma, iita ii mema ele amu, Nug hab atan ahilagnu babaitom daate amu ig amu ele dimpa anidkunignu ameg metem. <sup>5</sup> Amu ahilag oopa genab doyakpa Kayak Nug nuhig gagatagpa ag atog noadte. Nug ag atog noateb ukeb amu ahilagnu ehanitak okai babaitom daate amu gog tak haenpa aoglag. <sup>6</sup> Gemu haen imupa ag keeke diigdiigpa ug dooglagtai amge ag ehanitak okai

amu aoglagnu daateb amu ag amunu oolag gamag ahate. <sup>7</sup> Ug beteb amu ag diig imunu beteb. Ag bepeg, ahilag oopa genab doyak amu ena, gagatag daatete o iitate, amu antaknu aaku beteb. Danab ag gol, nug am nauhkunu keeke, ab adupa epedidteb, amubia ahilag oopa genab doyak, nug nauhkunu keeke iita, gol editak, enanag, amu epedidkunu ug amu ag beteb. Oopa genab doyak ahilag nug gagatag daaku amu dimpa, Jesus Kristus edua udi ku haenpa, ag humitak amu binag metak amu oo metak ele aoglag. <sup>8</sup> Amu ag Nug ii anidpig amge nuhignu oolag mauhte. Nug ii anidpig amge nuhignu oolagpa genab dooteb. Ag anam doona, haen imupa ag oo gamag ahak nadinab enanagnab ele amu dooteb. <sup>9</sup> Adinu? Oopa genab doyak ahilagpa ag nob ena, amuam Kayak ag edua diite amu, ag amu aaku aoteb.

<sup>10</sup> Edua diiak amunu amu propet, ag Kayaknu ehaniak okai hamu megte, ag gemu nai imu eb qeteb ele, ag amu aoglagnu dayeye, propet ag amu ii udiak haenpa amunu mehuqqig ele amu, ag edua diiak amunu diig dooglagnu, ag hetodin autnanab aopig. <sup>11</sup> Kristusnu Oudi ahilagpa dayom amu Nug Kristus ug maokunu, amunu binag metak dimpa udi kunu ele amu dab mak matom amunu ag amunu haen, amu nuhig keeke laa ele hetodidtapig. <sup>12</sup> Aria keeke amunu Kayak Nug propet ag amelagpa Mesias Nug ag ahilag haenpa beeb, anidkulagnu iita, Mesias Nug ag gemu daateb, ahilag haenpa beeb anidkulagnu aum. Amu ag keeke gemu daulagpa dooteb, nai amu Nadinu udat danab ag Kayak Oudi hab atannu gagatagpa

nai mehuqegeg dootēb amu propet ag amunu anuka hetōdin madipig. Keeke amu engel ag ele dooglagnu oolag nađi daate.

### *OPIA AWAK DAYAKNU EWAK*

<sup>13</sup> Amunu ag gagaṭag daaglagnu, ag dab mak ahilag bapaidna daanna, ag oiyak ahilag ele atog nona autna aona, ag Kayaknu ehanitak okai hamu megte ele amu, ag Jesus edua uđieb aoglag, amunuib dab menan dayeg! <sup>14</sup> Amu ag Kayak bekod daanna, Nug ode doyeg! Ag tatam kobol genab ii doopig daanna, dab mak nau dim lamidpig ele amu, gemu ag amu aib dim lamidpig. <sup>15</sup> Iita, Kayak Nug ag onilagpa eum, Nug opia awaknab daate, amubia ag keeke adi heteb amu opia awak daanna heig! <sup>16</sup> Amuam Kayak naipa, nai laa daate amubia. Nai amuam inam. “Nug opia awaknab daate amunu ag ele anam dayeg!”

<sup>17</sup> Ag Kayak, Nug am danab oh ahilag hak anen anenpa epediadku ele amu, ag Nug unuqidnana, Nug onig diin, Mame ateb amunu ag haen imupa do danab bia wan imupa oiteb amu ag nuhignu enanag doon, ag oolag ele otaieb, Nug onig binag meteg! <sup>18</sup> Ag alalkad ag ib ug ele dim lamiteg neum ele amu, Kayak Nug ag gemu daateb amu ag ib amupanu uhuqak ena aon, hab atan gokulagnu amu ib laa, keeke nauhte ele, gol, silwa bia, amupa ii daden meum. Iita! <sup>19</sup> Ag dootēb, Kristus, Kayak Beka, Nug am hipunin iita, dubutid ele iita amu ag Nug tiig enanag amupa uhuqak aopig. <sup>20</sup> Kayak Nug keeke oh ii beum haenpa Nug tituanom amge dimpa gog tak haen gamag imupaib Kayak me uđia, ag ehanadkunu miag atiom. <sup>21</sup> Nuhigpa

ag Kayaknu oolagpa genab dooteb. Nug mauhe, Kayak Nugib he, edua hibaite, Kayak Nug binag nadi metom amunu ahilag oopa genab doyak amu keeke ena awaknu dab mak gogpa tekunu ameg mak ahilag ele amu, Kayak Nugib keeke adit amu diilah daate.

<sup>22</sup> Ag gemu ag nai genab dim lamidteb amunu ag opia awak danab bena daateb amunu ag lailkad dilagnu oolag mauhte. Ag anam daateb amge ag tudidna, ag lailkad dilagnu oo mauhak genab ele doyeg! <sup>23</sup> Amu Kayak nai bauklele ele amupa ag menuak bau aon daanna, ag Kayak, Nug ii mauhte, Nug hanhan daate ele amu, ag Nug bekod daateb. <sup>24</sup> Kayak naipa nai amunu inam daate. “Danab oh ag gikidah bia daateb, ag binalag amu hadag bia daate. Gikidah qada edate amu hadag oh maudna, nena qeteb <sup>25</sup> amge Nadinu Nai am hanhan daate.” Nai Ena mehuqak ahilagpa udiom ele amu, nai amu aakuib ipuanadte.

## 2

<sup>1</sup> Amunu ag kobol nau oh dim lamidkulagnu amu ag uueg! Ag nai ham bupuak uuna amu ag aka ahilagnu, “Ig am danab ah enaib,” aib apig. Amu danab laa nug keeke kudum ele dayeb amu ag nuhignu aib oolag nauhom amu ag nai nau ele aib madipig. <sup>2-3</sup> Amu ag danab laa nug e laa lana enanag doote amubia ag Kayaknu enanag doona, ag Nug bekod daateb amunu ag ena mekulagnu, nid yud ag huh aoglagnu oolag daate amubia ag Kayak nai dooglagnu oolag dayad!

*NADI NUG MEN ENA BAU ELE*

<sup>4</sup> Ag Nadi Jesus topa doig! Nug amu bauklel diig daate. Nug am lag haknu men anuqak bia amu danab ah ag Nug uupig amge Kayak Nug nuka tituana, nuhignu am enanag doote. <sup>5</sup> Amu ag u<sup>u</sup>din, ag ele men bau daate ele bia daapeg amu Kayak Nug nuhig tamaniak ahilagpa heku. Amupa ag mana metak danab opia awak ele daanna, ag keeke Kayak oo niite ele amu, Jesus Kristus onigpa mana metak bia Kayak keeke amu metaglag. <sup>6</sup> Amu Kayak naipa, nai laa Jesusnu am inam daate. “Da men laa, amuam men enanag, amu epedi, Nug am dahil tamaniak gamagpa anuqak daate. Amu laa nug nuhignu oopa genab dooku amu Nug am ii uuida. Iitanab iita.” <sup>7</sup> Ag nuhignu oolagpa genab dooteb amu ag nuhigpa ehanitak okai aoteb amge danab ah ag oolagpa genab ii dooteb amu ahilagpa Nug inam beum daate. “Udat danab ag men amu uupig ele amu, gemu Nug lagnu anuqak daate.” <sup>8</sup> Aria Kayak nai amunu laa am, “Men amu nug danab ag oolagpa genab ii dooteb ele amu, ag men amupa baelag qekulagnu daaku. Yo, men amu heeb, danab ag nena qekulag.” Adinu ag baelag qekulag? Ag nai ena oolagpa genab ii doopig amunu Kayak antom amubia ag heteb.

<sup>9</sup> Amge ag Kayaknu danab, ag gatatupa daaegeg, Nug diia, amahlak enapa maatom ele amu, ag Nug ahilagpa ena heum amu miag atiglagnu, Nug ag tituanate daateb, ag am nuhikud mana metak danab daateb, ag am danab ah opia awak daateb, ag am Kayak nuhignab danab ah daateb. <sup>10</sup> Anuka amu ag Kayaknu danab ah ii daapig amge gemu ag nuhignab danab ah daateb. Amu anuka ag hipuninu nob nau, ag amu aoglagnu daapig

amge gemu amu ag nob nau amu aoglagnu ii daateb.

*KAYAKNU BEGBEG DANAB DAYAKNU NAI*

<sup>11</sup> O lailad, ag danab atu laapanu, ag am do danab ele bia, wan imupa daateb amunu da ag bedulagnu kobol nau, kobol amuam ag hanhan ig Kayak amegpa danab ena daamtanu wagai meteb ele amu, ag kobol amu ii hemananu unuqadtem.

<sup>12</sup> Amu ag danab laa Kayak baekudpa ii daateb ele amu, ag ag oolagpa daanna, kobol ena tutukuib heig! Ag anam hebepeg, danab amu ag ahilagnu nai nau akulagtai ge ag ahilag kobol ena amu anidna, haen Nadi Nug ig danab ig ehanigkunu udiku amu ag ele Nug binag mekulag.

<sup>13</sup> Nadi Jesus Nug Kayak ode dim lamidtom, diig amunu ag ele gabman epeg laih laih oh, Kayak maatom daateb ele amu, ag odelag dim lamiteg! Amuam danab okainab, laa oh edatak daate, nug ode dim lamidkulag amu <sup>14</sup> nuhikud ehanitak, nug waapa daanna, udat heteb amu, ag odelag ele dim lamiteg! Gabman okai nug danab, ag nug waapa daanna udat heteb ele amu, ag ehed hak danab nob nau matanna, danab ag kobol ena heteb ele binalag mekulagnu maate, udat heteb. <sup>15</sup> Ag amu odelag dim lamidkulagnu diig am, Kayak Nug oo daate amubia ag kaaka danab dilag nai, maitak iita ele amu, nai amu qepeg nekunu kobol enaib hekulag. <sup>16</sup> Amu ag danab uhuqak ena aon daateb amunu ag danab uhuqak aopig bia oiyege! Amge amupa ag kobol nau lokumna aib hepig. Ag Kayaknu kobol ena dim lamidnana, nuhig udat danab dayeg! <sup>17</sup> Amu ag danab oh binalag eleleib

meig! Ag lailkad Nadinu oolagpa genab dooteb ele, amu dilag oolag mauhad! Ag Kayaknu enanag doon, oolag ele otaiad! Ag wanpanu gumitak danab okainab, laa oh edatak amu ag nug onig ena meteg!

***BEBEG DANAB AG JESUS OIYOM AMU DIM LAMIDNA UG MAOGLAG***

<sup>18</sup> Aria begbeg ag gumak danab ahilkad waalagpa daanna, keeke ohpa ag binalag kobol elelepa meig! Gumak danab ena dilagpaib iita, gumak danab nau, ahilagnu ehed heteb, amu ele waalagpa daanna, ag binalag kobol elelepa meig! <sup>19</sup> Ag anam daanna, Kayaknu dab menana oipeg, gumak danab nau ag guitak madapeg amu Kayak Nug haen amupa kobol amu, ag begbeg ag hepig ele amunu oo ena daaku. <sup>20</sup> Aria ag begbeg danab ag kobol ehed laa hepeg, ahilkad gumak danab ag guitak madapeg, ag begbeb ag ahan wagai ii mekulag amu, ag amunu atemun ag nob ena aoglagnu dab mekulag. Amge ag begbeg ag kobol ena laa hepeg, ahilkad gumak danab ag ahan guitak madapeg amu, ag begbeg ag bodo etak daanna, edun wagai ii mepeg, Kayak Nug kobol amunu oo enaib daaku. <sup>21</sup> Amu Kayak Nug ag kobol amu dim lamidkulagnu onilagpa eum. Adinu? Kristus Nug guitak nadi ag ehanadkunu awom. Amu Nug ag kobol nuhig dim lamidkulagnu amu kobol aaku ipuanatom. <sup>22</sup> Nug am hipunin laa ii heum amu nai ham bupuak laa odepapa ele ii beum. <sup>23</sup> Amu danab ag nuhignu nai ehed apig amge Nug nai ehed ahilagnu nob ii meum. Nug guitak awom amge nuhig guitak amunu Nug ag

nob nau aoglagnu ii aum. Iiṭa, Nug nuḱa Nug bedu oh Kayak, Nug am epediak danab keeke oh elepaib epedidte ele amu, Nug epegpa meum. <sup>24</sup> Ig hipuninnu begbeg daamtanu, ig Kayak dim lamidkunignu, Jesus Nug ihinig hipunin oh ad emaitakpa mawom. Genab Jesus nug guitak awe, ig amupa elele daatem. <sup>25</sup> Am anuḱa ag am sipsip heteb, amubia ag ib etan gopig amge gemu ag edun ahilag gumak danab, ahilag okai, Nug am ag atog noadte ele amu, Nug gumidna udipig.

### 3

#### *EWAU DILAG NAI*

<sup>1-2</sup> Amubia ah ag danab ele amu, ag gamulḱad waalagpa daanna, kobol enaib heig! Ag anam heḱulagnu diig am inam. Danab ahilḱad oolagpanu laala ag Kayak nai ii dim lamidteb dayeb amu danab amu ag waalḱad ag pehetak daanna, kobol tutuku ele dim lamidna oiṭeb anidna, ag ele oolag edueb, oolagpa genab dooglag. Ag ahilḱad ah dilag kobol ena anidna oolag eduḱu, ag waalḱad dilag nai matiak amupa iita. <sup>3</sup> Amu ah ag idulag tuḱak ele daaglagnu, ag bedulag dimitimnuib keeke aib dab mepig. Amuam iḱilag udug bala meṭak, bedulagpa bala golpa hak meṭak amu lamen ena ena maknu ele. <sup>4</sup> Iiṭa, ag oolag unuḱagpa bala meṭaglag amu ena. Bala meṭak amuam nauḱunu elele iita. Bala amuam oo bodo etak kobol amu nai hak iita kobol ele. Kobol amu Kayak noobpa amu enanag. <sup>5</sup> Anuḱa ah ag Kayaknu oolagpa genab doon opia awak daadtapig, ag amu oopan bala ena anam mena, gamulḱad waalagpa ena, bodo etak



oidpig amunu ag idulag tuqak daadtapig. <sup>6</sup> Amu Sara nug kobol anam heum. Nug Abraham ode doya, nuhignu, “Nadi dahil,” awa atom. Amu ag gemu daateb ele amu ag kobol ena heteb dayeb, ag keeke laanu oolag ii otaitē dayeb amu ag nug adekud daateb.

<sup>7</sup> Amubia ele ah gamulkad ag waalkad ele daanna, kobol ena ahilagpa heig! Ah ag geha gamulkad ele oh Kayaknu ehanitak okai hamu megte amu aona, bauklel daaglag amunu danab ag ah dilagnu, “Dahil kadoi, nakok gai iita bia,” doyardnana, binalag meig! Ag amu oh hekulagnu diig am geha keeke laa unuqitak ahilag heeb ii nauhma.

### *KOBOL ENA HA, UG MAWAKNU KOBOL*

<sup>8</sup> Aria nai imunu gogpa tekulnu amu ag oh oolag laipu ele dab mak laipu ele dayeg! Amu ag oo doyak doonna, eamag nug oo mauhak dootēb ele amu, ag amubia laa Kayaknu oolagpa genab dootēb ele amu, ahilagnu nug oo mauhak ele doyeg! Ag nug ehanitak ena henana, ag aka anen anen ag onilag qepeg neeb oiyeg! <sup>9</sup> Amu na layap nug nahippa laa ehed heeb amu na aib nob mena, nuhigpa ehed heme. O iita nug nai ehed laa nahipnu ab amu na aib nob mena, nai ehed nug amegpa ame. Iita, na Kayak Nug ititak ena medakunu unuqite! Adinu? Kayak Nug ag anam hekulagnu onilagpa eum. <sup>10</sup> Amuam Kayak naipa, nai daate amubia. Nai amuam inam. “Aun laa nug oo gamag ahak bauklel dayaya, haen ena ele anidkunu oo dayeb amu nug nai nau ii matima, amu ele nug odepa ham bupuak nai ii matima.

<sup>11</sup> Am nug kobol nau di mata, kobol ena haaha, nug madod kobolpa daakunu matiak udat had!  
<sup>12</sup> Adinu? Nadi Nug danab tutuku anidkunu neegte, ahilag unuqitak ele doote amge laa ag kobol nau heteb ele amu Nug ahilag nu oo elele ii daate.”

<sup>13</sup> Aria na kobol ena eleleib hepe amu danab laa nug na ehed laa ii heidma bia <sup>14</sup> amge na kobol enaib henana, diig amunu guitak aokut dayeb amu na aaku gagatag medate dookut. Na laa ag ehed heidteb amu, na ehed hak ahilag nu amu na aib oot otaiom, na oot amunu badak ele aib doynom.  
<sup>15</sup> Iita, ag Kristus Nugib aon oolagpa ahilag Nadi anuqak meig! Keeke ena ag ameg men daateb ele amu, laala ag amunu diig nu od madapeg amu ag nai nob mekulag nu bapaidna daaglag <sup>16</sup> amge na oot bodo etak ele dayeb, danab amu binalag menana, nai nob ena mate! Na anam hekutnu diig am, danab laa ag na Kristus dim lamidtem anidna, na hak ena hetem ele anidteb amunu ag nahipnu ehed ateb, amu na nainu nob elele bodo etak elepaib madape amu ag nai ehed nahipnu maditeb amu ag amunu udalag neku. <sup>17</sup> Amu Kayak Nug ig kobol ena hetemnu ug maognig nu oo daaku dayeb am ena amge kobol nau hetemnu ug maotem daaku dayeb amu, amuam kobol ena iita.  
<sup>18</sup> Adinu? Kristus Nug hipunin ihinig uhuqkunu haen laipu aaku mauhom. Nug baula ii mauhma. Nug am opia awak danab, Nug ig omaika, Kayak topa wakunu, ig danab nau, ig abeninig awa mauhom. Nug am danab be du awe, qeeg mauhom amge Kayak Oudi Nug he, edua hibaitom. Nug bauklel daate. <sup>19</sup> Amu Kayak Oudi nuhigpa Nug uka, oudi mani guitakpa daapig amu amelagpa

nai mehuqom. <sup>20</sup> Oudi amu ag am danab anuka Noanu haenpa Kayak ode tapaeg ne, Kayak Nug pahanab ahilag nob nau madakunu ii dab meum. Iita, Nug oo aeg paha ii beebe, ag amelag meeme, Noa nug ub itom. Ub amupa amu danab ah eblaih ewam ele ag aka oopa nona daanna, ag danab ah nau ele ou qena, ag ele nena qemananu ag lepa ehanitak aopig. <sup>21</sup> Aria ag gemu daateb amu, ag am Noa adi, ag adi keeke ipunigteb bia daateb. Ag ele lepa ehanitak aoteb. Amuam layatak amge layatak am bedunigpanu dubutid ihaknu keeke iita. Iita, nug am ig oonig opia awak daakunu keeke. Jesus Nug edua hibaitom amunu udat amupa Kayak Nug heeb, ig anam daagnignu Nug nai nuhig amu qaka aum. <sup>22</sup> Jesus Nug edua hibaita, Nug hab atan teum. Nug Kayak epeg nadiappa, amuam anuqak aben, amupa daate. Engel amu, okai dayak oh amu, gagatag diigdiig ele oh Nug waapaib daateb.

## 4

### *KOBOL NAU UUA, KAYAK DIM LAMITAKNU NAI*

<sup>1</sup> Aria Kristus Nug danab bedu awom, bedu amupa guitak nadi awom amunu ag ele Nug heum bia dab mak gagatag aweg! Adinu? Danab nug ug bedupa awom amu nug aaku hipunin kobol ohnu uuidte. <sup>2</sup> Amunu amu dimpa, haen danab amu nug bau dayaya wanpa oite amu nug kobol nau baula ii dim lamidte, danab laa heteb bia. Iita! Nug Kayaknu dab mak dim lamidte. <sup>3</sup> Danab ag Kayak bekod iita amu ag kobol nau diigdiig heteb. Aria ag gemu nai imu aoteb amu ag ele anuka kobol anamib hedapig amge gemu ag ii

heteb. Laa ele amu ag baula aib hepig. Kobol amuam inam. Gapai awak kobol, kobol naunu oo ahak, le gagatag lawowa kaaka qak kobol, hobul augigiakpa wanak, le gagatag lana mauhnoak oiyak, Kayaknu do tape ne, kayak ham bupuak binag mak kobol ele. <sup>4</sup> Amu gemu ag aaku kobol nau amu ag baula ii heteb amunu danab Kayak baekudpa iita, ag ag ele kobol nau amu gemu ii heteb amu ag amu anidna otaina, ahilagnu nai ehed ateb. <sup>5</sup> Amge dimpa ag aka Kayak amegpa ag kobol heteb amunu miag atinna akulag. Nug am epediak danab amu Nug danab bau daateb amu mauhpig ele oh kobol anen anen hepig amupa nob nau madaunu babaitom daate. <sup>6</sup> Diig amunu anuka Nai Ena amu danab mauhpig dilagpa ele ukom. Amu amupa ag bedulag hetodiakpa daaglag amge Nai Ena ahilagpa mehuqom amupa ag dotolag ele Kayak Nug bauklel daate bia daaglag.

<sup>7</sup> Aria keeke oh iita mekulagnu haen aaku guguitak daate amunu ag unuqitak ena hekulagnu elele daaglagnu, ag dab men autna aona, gagatag dayeg! <sup>8</sup> Ag lailkad dilag huana oolag mauhkunu amu dab mak ahilagpa anuqak dayad! Adinu? Layagnu oo mauhak kobol nug kobol ehed kudum tone, iita mete. <sup>9</sup> Ag lailkad dilagnu nug ehanitak kobol aib uupig. Ag oolag gamag ahebeb hekulag. <sup>10</sup> Amu ag oh anen anen Kayaknu ehah aopig amunu ag ehah amupa Kayak Nug ehanitak okai amu hamu megaka, udat hekunignu oo daate bia lailkad ehanateg! <sup>11</sup> Ao, danab oh ag ahilag udat ena anidna, Jesus Kristus onigpa ag Kayak binag mekulagnu amu danab laa nug Kayak nai mehuqte

ele dayeb amu, Kayak nai tutuku mehuqad! Amu danab laa nug layag ehanidte ele dayeb amu nug gagatag Kayak medte ele amupa udat had! Kayak Nug am onig ele amu gagatag hanhannu ele. Genab.

### *KRISTUS ELE OU QA, UG MAWAKNU NAI*

<sup>12</sup> O lailad, ug doyak kobol ab ewak bia ahilagpa beteb, amupa ag aib otaina, “Kobol laanab iiku beteb,” aon apig. <sup>13</sup> Iita, ug anampa ag Kristus ele oh ug maoteb doonna, amunu oolag gamag ahad! Amu dimpa Nug onig okai miag atiak beku, haen amupa ag oo gamag ahak nadi doonna amu ag oolag ena ele daaglag. <sup>14</sup> Amu ag Kristus onig gagatag adateb amunu danab laa ag ahilag nu nai ehed akulag amu ahilag nu am ena. Adinu? Kayak Oudi binag ele, Nug ag ele daateb. <sup>15</sup> Ag kristen daateb amu ag oolagpanu laa nug dug wak danab, o iita yabhok danab, o iita kobol nau diigdiig nu hak danab, o iita danab laa dilag di-tuanin matak danab aib dayom. Ag kobol amu laa hekulag amu ag guitak aoglag amunu ag guitak amu aomnanu ag kobol laa amubia aib hepig. Ag diig amunu guitak aib aopig. <sup>16</sup> Amge danab nug Kayak baegpa dayaya, amupa nug guitak aote dayeb amu nug uda aib neum. Iita. Nug onig Kayak baegpan danab daate amunu Kayak binag mad! <sup>17</sup> Kayak Nug danab ah epediadkunu haen dig ma miagnab daate amu Kayak nuhikud danabnab tatam epediadku. Amu ihinigpa epediak dig meku amu danab ag Kayaknu Nai Ena tapaeg nete ele, ahilagpa amu atemnab daaku? Ag ug naunab aoglag. <sup>18</sup> Amu tutuku danab edua diiaknu udat

am ug ele dayeb amu danab Kayak baekudpan iita, ag am hipunin danab ele amu, atem nab ahilagpa beku?

<sup>19</sup> Amunu Kayak Nug guitak aoglagnu elele a amu danab laa ag guitak aoteb amu, ag tutuku oina, bedulag oh Kayak, ig heikom ele, Nug epegpa meig! Nug am ig hanhan atog noigte.

## 5

### *IKI DANAB AG KAYAKNU SIPSIP TUTUKU ATOG NOADKULAGNU NAI*

<sup>1</sup> Ahilkad iki danab amu, da ag oolagpa da ele iki danab bemi daatem, da amelpañab Kristus Nug ug mawe anidmi, da ag ele, ig oh geha Kayaknu ehaniak okai amu heeb miag atieb aognig amunu da ag iki danab ag udat inam hekulagnu ag mad adakulnu nai imu yaatem. <sup>2</sup> Ag Kayaknu danab sipsip bia ag epelagpa daateb amu atog noadna autna aweg! Ag do waapa bia daanna, toliak udat aib hepig. Iita, ag Kayak oo niite amubia ena doonna hekulag. Ag men dodoib aoglagnu aib dab menana hepig, ag oolag ahebeb hekulag. <sup>3</sup> Ag toliak, ag Kayaknu danab, Kayak Nug ag epelagpa maatom daateb ele amu, ag amu dilagnu hamu bia anadkulagnu aib hepig. Ag kobol ena henana, danab ena daanna, ib ena amu Kayaknu sipsip ipuanadpeg dim lamiteg! <sup>4</sup> Anam dayeb amu Sipsip Gumak Danab anuqak daate, Nug edua udieb, ag onig okai ii nauhte ele amu aoglag.

<sup>5</sup> Danab bau ag onilag qepeg neeb, ahilkad okai waalagpa dayeg! Ag oh ag nug waapa dayaknu kobol hena, lailkad waalagpa dayeg! Adinu? Kayak naipa, nai amunu inam daate. “Kayak

Nug hibguita danab amu ahilag ib oo nete amge Nug danab ag onilag qeeg nete ele amu, Nug ag ehanadte.” <sup>6</sup> Amunu ag aka ag onilag qepeg neeb, ag Kayak epeg gagatag waapa daapeg amu Nug geha nuhig dedpa ag humadku. <sup>7</sup> Kayak ag gumata atog noadte amunu ag ug ahilag oh amu Nug epegpa meig!

<sup>8</sup> Ag hanhan dab mena autna aweg! Satan, nug am keked ahilag, nug am laion laa bia danab laa diia laadkunu huanak gayaya oite. <sup>9</sup> Amu ag oopa genab doyak ahilag gagatag adan daanna, ag nug mautpeg ukad! Ag dooteb, wan atu ohpa lailkad daateb amu ag ele ug ag dooteb bia doonna daateb. <sup>10</sup> Kayak Nug am ehanitak okai hamu mekak kobolnu diig daate amu Nug ag Jesus Kristusnu udat okai, ag geha nuhig amahlak ena hanhan daate ele amu, ag amu aoglagnu onilagpa eum amunu ag geha ug haen tutuib doonna daapeg amu dimpa Nug edua heeb, ag ena daaglag. Amu Nug geha humata, ag gagatag adualateb daaglag. <sup>11</sup> Gagatag oh nuhigpa hanhan daate. Genab.

### **BAG QAK NAI LAALA**

<sup>12</sup> Amu da Silas nuhig ehanitakpa da nai tutu imu ahilagnu yaami. Da nug am ig oh lainignab dootem. Amu udug imupa da ag gagatag aqakulnu, da ag Jesusnu nai oolagpa genab doopig ele amu, nai amunu diig am Kayaknu ehanitak okai hamu megte, da amu ipuanadkulnu yaami. Ag agupa gagatag dayeg! <sup>13</sup> Amu kristen tamaniak laa ag bia Babilon daateb, Kayak Nug tituanatom ele amu, ag ele humatak nai ahilagpa meeg gote. Amu da bekal Makus nug ele humatak nai me gote.

<sup>14</sup> Ag nug humitak oo mauhak kobolpa heig!  
Amu ag oh ag Kristus ele ou qak daateb amu,  
madod ahilagpa daakunu ool daate.



**KAYAKNU NAI Tituanak Bau**  
**The New Testament in the Nobonob Language of**  
**Papua New Guinea**  
**Nupela Testamen long tokples Nobonob long Niugini**  
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 3 Mar 2023 from source files dated 9 Oct 2020

ed374bb9-d819-53d1-a85b-f86cce3892e1